

續

藏

書

續藏書卷十八目錄

經濟名臣

太子太保梁端肅公材

太子少保劉清惠公麟

尚書雍公太

尚書吳公廷舉

尚書顧公璘

附弟璵

少保王襄敏公以旂

太子太保周襄敏公金

太子太保熊公浹

尚書胡公松

尚書鄭端簡公曉

太子少保李敏肅公世達

尚書陸莊簡公光祖

續藏書卷十八目錄終

續藏書卷十八

經濟名臣

太子太保梁端肅公

事

泰陵

康陵

公名材，字大用，南京金吾右衛人。幼岐嶷，儼如成人。甫受學，輒慨然有經濟天下之志。弘治己未登進士，授德清令。赴苦而勤敏，一日勘事他邑，重囚械獄去。公還禱於城隍，未幾就擒。公詰之曰：「汝旣遁，何復爲我擒？」賊曰：「有一緋衣人尾之，欲脫不能耳。」人咸以爲異。正德二年，晉刑部廣東司主事。四年署貴州司員。

外郎獄小大無遁情大司寇洪公鍾每命諸司錄其讞案以爲法五年改山東道御史逆瑾誅榜諭天下出公手筆大學士李公東陽見而絕愛之及爲史記李公與楊公廷和各製一篇不愜意乃會司寇何公鑑中丞楊公綸令其屬徧爲之李公見公作喜曰此以古詞兼律筆足示後矣遂錄付史館六年出知嘉興未幾調杭州杭以繁富名公至愈以清約自勵入覲具一書二帕贊京貴橐中無一長物而公之廉幹益有聞十一年進右叅政尋進按察使會宸濠變起

濠去浙邇，倚鎮守中人畢真爲內應，人心洶洶。御史張縉謀於公曰：「事急矣，將若何？」公卽就案草檄調兵，方略布置，一日悉具。又自往說真，令撤兵衛。自是姦謀內沮，兩浙恃以安。嘉靖二年，以服闋再爲雲南按察使。先是，有土酋相讐，夷者六載未定。御史曰：「須公爲之。」公即召至，諭以王法當誅死。今姑貸汝，如例罰牛羊若干以贖。」土酋頓頸輸服。御史難其太輕，公言：「治夷法，如是足矣。不爾，是激之變也。」後調知夷果密，調兵聞無他，乃止。三年，晉貴州左布政使，尋調廣東。

凡入民課金令輸者自權之而親爲監督主藏者不得高下其手往來傳置諸所餽遺卽果蔬弗受也公兩典名郡及爲藩臬長壹以便民爲務頌聲載途所至立專祠祀公六年進右副都御史巡撫江西未兩月召爲刑部左侍郎七年改戶部兼右僉都御史總督雲貴川廣糧餉偕總制伍公往平雲南至澧州聞捷還辭兼職冬晉尚書十年丁內艱十三年召復任駕謁山陵公受勅偕宣城伯衛公錞居守如是者三十七年以考滿解職明年廷臣上議言司徒

乃國計大臣總領財賦得人實難竊見材操心廉直  
終始不渝且綜理旣閑出納有執實清朝人才之望  
及今未衰尚堪任使乞蚤召用以盡其材上俞之  
起公原官加太子少保公在位素令親信察市價低  
昂攬戶不得乾沒所省官錢不可貲算永嘉張公新  
貴用事常以意氣挫折公卿一日於朝堂厲聲語云  
染大用某處糧草當辦則應曰諾某處折銀當發復  
應曰諾永嘉意其黠黠弗了也旣而偵之則無弗夙  
具者乃歎曰渠固若是辦耶上念吏治龐雜特命

公以司徒行考察所汰簡者數百人人心大服又大

獄久不決者四事上命兼司寇讞勘之居數日盡

得其情擬奏上喜曰得尚書十二人如材者朕可無憂矣事竣乃還印刑部皆以特旨從事前此未

有也平生爲國薦賢絕不欲人知是時士大夫頗尚

圓通公卿或阿上取寵而公獨屹然自守有古大臣

風然竟以此忤於時翊國公郭勛恃寵專擅損兵冒

餉公疏劾之上下其章所司讞勛威莫敢詰復按

勛不法十事草成未上爲僚友泄其語反爲所中遂

落職歸，歸兩月而卒。嘉靖中，工作大興，邊費無藝，加以水旱，癘疫所在告災。公籌之，殫竭心力，必不稍以加賦於民。在職力主節財，諸濫請浮費悉斥不應。初，世廟以祠禱故，於額外有所需，公執曰：「終不以無益虧國計。」世廟心弗善也。頃之，公去，且死，卒至邊儲，大窘，計無所出。世廟乃歎曰：「令梁材在，當不至是。」居恒約敕僚屬，壹意奉公，自起家縣令至司徒處，公解者什九，私居者什一。終日高拱堂皇，內外肅然。在廣東日，右布政林富市肉數多召其僕，誠勿過豐。富

聞之大怒、短衣露頂、踉蹌而出、詈不已。公頗視簿書、端坐自如、富慙而退。爲司徒、語其屬曰：「若輩與人一接杯酒、歡有干謁能峻却之乎？」率之日、坐部治事、無敢闌出入。以故夤緣請寄、悉格不行。而歲計益治。公狷潔正直、出於天性。佐食以園蔬、絕無兼味。公服用漸蕉極下者、底裏不厭澣綴。唯兩裾鮮潔而已。爲尚書宅、憂歸始有居室。崔公銑稱之曰：「自公召還司徒塗人丐子相語云：『今天眼開。』召回梁公矣。」此與司馬公入朝何異。西長安有屋一區、予嫌其陋。公至、卽居。

之但埽地塗壁而已子甚媿不及也卒之日家無餘  
貲子孫至不能之京斬卹典隆慶初奉遺詔補給祭  
葬贈太子太保謚端肅子祭四壇哀榮之典爲始備  
云

太子少保劉清惠公

事

秦陵

庫陵

公名麟字元瑞其先江西安仁人國初以武功籍南  
京廣洋衛至公始登弘治丙辰進士是時外戚張氏  
驕橫骯法臺諫擊之逮治甚急公與歸安陸崑抗章  
申救敬皇爲之震威事尋得解除刑部主事進員  
外郎錄囚畿內所疏雪冤滯無慮數百人轉郎中擢  
守紹興漢劉寵故處也在郡精核廉敏甫五日郡聲  
大和逆瑾銜公出守不修謁猶掇郎中時瑣細廢爲  
編氓郡人爭致贐公曰勤苦諸君吾治不逮前劉敢

蒙一錢惠耶。既去，越人肖像爲小劉祠，語在太宗伯王公華記中。時與龍霓及湖人吳珫施侃陸崑交，因徙居于湖山人孫太初亦以羈旅入社。湖中風雅稱中興焉。瑾誅，起知西安，遭內藉去郡，服闋遷陝西參政。屬關內饑虜數深入，朝遣貴臣督兵將厚賦軍興，諸司莫敢異。公曰：「靖邊本以衛民也，民可先困乎？」使者色沮。會有赴闕陳訴者，命與叅政共圖其便，議遂寢。公亦嚴覈侵漁，括逋負，邊儲竟以不乏。踰年，擢雲南按察使。謝病歸。嘉靖初，起爲太僕寺卿，擢副都御

吏巡撫北畿復引疾章至三四上始得請時論方高  
公才節再起爲大理寺卿改刑部右侍郎尋陞工部  
尚書水衡泉貨之府高潔士頗避之公咨白吏部盡  
選才庶充曹任即填庫始此仍請築外帑剏四司之財貯之特銓  
主事一人與臺臣同典出納上嘉公意賜庫名曰  
節慎實自公始凡工部上供率關內府所徵多清典  
式不受羈公條上最甚者十二事得旨裁之中貴人  
用此銜公會上遺近璫督造龍袍於蘇松公請罷  
遺忤旨勒令解職公旣歸益遠世紲里中不復知

有鉅公者，其於文以冲夷雅澹之詞，發瑰奇崛之氣，幼眇穠纖，冥與神會。書法宗義，獻以還，片簡尺牘，人爭寶之。至與人談謔，往往出微辭臻妙趣，早參玄理，無違天命。嘗請王公廷相預作墓銘，好樓居，而力不能作，友人文徵明寫層樓圖遺之，常懸之壁。命曰神樓，賓至則陳法書名墨以爲娛，叩以時事不答。公卿交薦，公不知也。性清約，疏布自喜，事繼母戈，遇異母弟鳳尤篤恩禮。先人田廬，悉以委之，絕不以豐約累志。太宰李默言公僦居溧陽，嘗遣門人候之，公引

至卧内見四壁惟掛書數束他無長物又二十年觴

李太傅姜公風雅

公風雅

予峴山逸老堂了無宿具旋以乳羊博市沽風雨蕭

蕭欣然達夜其風尚如此嘗以爲公掞文似公幹治

財似士安剛介不撓似器之至于廉約省素家無餘

貲位列三事以功名始終此與東牟劉祖榮何異世

稱二劉不其然乎年八十有八卒贈太子少保謚清

惠

尚書雍公

事

茂陵

泰陵

康陵

公名太字世隆陝西咸寧人成化五年進士授吳縣知縣吳濱湖湖漲沒田千頃公作堤民受其利稱雍公堤吳民有妾亡者妾父訟其夫殺女兩月匿尸湖中石下召夫訊夫曰妾逃兩月踪跡莫知妾父脇財始知死所公使人視其尸乃訊父曰夫殺汝女汝安知匿于石下且此豈兩月尸邪此必非汝女汝殺他人女冀得賂耳一拷而服十年召爲監察御史巡鹽兩淮淮寗丁貧而鰥者幾三千人公巡滿俱與完室

歷陞浙江右布政使時勢家鬻販私鹽鄉人效尤盜  
竊橫行公先收勢家人抵罪於是盜竊稍息爲都御  
史巡撫宣府參將李稽不法部下狀其惡公具草且  
上稽跪堂下乞受責公曰此亦軍法縛下杖之三軍  
股慄已乃譖公於時相言官遂劾公以擅辱將官罷  
之退居韋曲別墅不涉城市正德二年給事中潘鐸  
薦公有敢死之節克亂之才超起左副都御史操江  
固辭弗允未幾陞南京戶部尚書時逆瑾用事以公  
鄉人不肯相親斥公去而諸所薦公者鈞陽靈寶

皆獲罪。公歸復居韋曲，與鄉人論穡事，不與上官相見。族黨有犯，必告有司曰：「某是某非，幸無以太故屈法也。」年八十卒。

尚書吳公

事

泰陵

惠陵

永陵

公名廷舉，字獻臣，嘉魚人。成化二十三年進士，授廣東順德知縣。潔已字民時，華容劉公爲左布政使，知公移公，輒具尺書。公益盡力效職。有都御史召見，公甚溫。廷舉請事，都御史曰：「順德有大當某屬我修其家廟，可稍葺之。」公謝曰：「令非有舊例，新恩一夫不敢役一錢，不敢費。」市舶太監出銀市葛，公卽以銀市二葛，曰：「奉此爲式。」如不中，請還金。且葛雷產，非此中有也。太監怒，取金去。汪御史惡公曰：「彼專抗

上官市已能會公壞淫祠，撤其材作土堤書院賢館。  
修學宮、御史按而會其直，竹木碎屑計斤兩。公囚服  
梏手，日詣訟所，士大夫羣泣訴公亡私盜狀。御史大  
慚，釋公。弘治九年，都御史者入爲吏部尚書。公時爲  
令十年矣，乃遷成都同知，起復，改松江。十八年，廣東  
盜起，陞兵備僉事。討平十三村池水盜。正德二年，革  
兵備三年，改鹽法兼屯田。四年，陞廣東右叅議，再逾  
月，陞瓊州兵備副使。時逆瑾專權，公發鎮守內官潘  
忠二十罪，又奏有旨取省帑解京，皆非正費。曰貢。

進內也。曰司禮打點錢賂瑾也。五年瑾矯旨坐公枉道荷校不次戍鴈門。再月赦還鄉。是年瑾誅改雲南兵備副使六年陞江西右叅政計桃源賊時總制數易官兵不協力歷數年賊益熾公饒智略勇不避難與副使胡世寧發憤欲設奇取捷平賊諭使解散反爲賊得。賊刦公求撫公詞色不撓久之伺得賊中要領公誘勁賊執其酋出復入討平之九年陞廣東右布政使立番舶進貢交易之法平傳役十年嶺西猺獞作亂兼兵備副使撫治廣東諸府十一年轉左十

二年湖南饑陞副都御史賑濟十三年勅勘永順  
保靖兩江口夷情公爲堅明約束條奏上十四年還  
京復出湖南定諸夷地界又疏言六事備宸濠變宸  
濠大恨唯恐公巡撫江西嘉靖初召爲兵部右侍  
郎上疏忤輔臣改南工部又改南戶部晉右都御史  
理南畿折豪強植貧弱禁私驛止妄工南畿肅然公  
長身而瘠面如削瓜衣敝帶穿不事藻飾神采英毅  
志識雄偉言行必自信人鮮能奪之視財如糞土妻  
子饑寒而施予不較有亡陞南工部尚書卽疏歸

二年卒，年六十六。公居湫隘，亡郭外田，顧有書至萬卷，卒之日，不能歛。都御史姚鏘爲之經理，崔文敏公稱公貞才潔履厚行定力鮮儼。又曰：公恒衣食人妻子，乃不能給官四十年，百瘁九死，不能一日安于朝。推下賢哲，不憚屈已。卒未聞報德者。

鄭端簡曰：大臣持繡斧督撫方隅，固欲其威望素著，然必有恩信焉。非約已裕人與士卒同甘苦，與農疇共休戚，而徒欲以武健警夷蠻，金璧媚津要，數月日幸無事，得內遷卽劖祠樹碑，稱頌功德，人誰信之。此

五公

楊信民韓雍鄧廷舉

者，信心而行，磊磊落落，恩威

敷布，沒世不忘，卓乎不可及矣。

尚書顧公

事

泰陵

康陵

永陵

一

公名璘，字華玉。上元人。弘治丙辰進士。授廣平縣知縣。入爲南吏部驗封司主事。進稽勳郎中。正德庚午，出知河南開封府。癸酉，謫授廣西全州知州。丙子，起知浙江台州府。陞浙江左叅政。嘉靖丙午，陞山西按察使。以病免。庚寅，起爲江西按察使。未行，陞浙江布政使。壬辰，召爲都察院右副都御史。巡撫山西。疏乞終養。忤旨，落都御史。以布政使致仕。丁酉，再起爲右副都御史。巡撫湖廣。己亥，陞刑部右侍郎。改吏

部會顯陵肇工改工部領山陵事進工部尚書事竣還朝改南刑部尚書公融朗闊達精於吏理能激昂任事初蒞廣平甫弱冠耳而關決敏利摘伏若神及爲開封盜起燕薊流刦中原所在繹騷彭公澤領兵壓境上簡公自輔公練兵轉餉取具呼吸折衝戡亂謀畫居多鎮守中人廖堂恃逆瑾黨圍奪自恣公每折其萌芽瑾誅廖罷去而王宏者尤諍謾繼廖出鎮公故不爲禮有所徵需一不答歲時展謁長揖而已用是積忤宏宏方恃錢寧爲援矯詔逮赴錦

衣獄、公抗言條對、一無所承、寧無已、遣邏卒陰探郡中、無所得、乃文致他比以上、鐫三階、徙全全僻荒遠陋、公不鄙夷其民而拊教之、久之、民用乂安、士興于學甫三年、移台州、台武衛錯居、俗犷而喜訐、胥吏並緣爲姦、公爬疏剔抉、求得其利弊所在、次第興除之、故事、武衛諸城郡爲修築、費率爲主者乾沒、恒歲一築、築輒壞、公鉤得所侵漁、悉沒入爲城費、擇人經理、故所隸三城特完、郡瀕海、貧民業鹽自食、苦邏卒窘之、相賊殺不止、公爲弛禁、俾得負販出郡下、而薄其

稅入往軍餉不時給貧軍多稱貸駟僕得肆侵牟公  
支放有期軍皆給足而姦民無所牟利矣郡南瀕江  
多水患有中津橋且壞公修復之因築石隄而樓其  
上凡數十楹人莫喻其旨已夏潦水猝至居民得依  
樓以避所活以千計乃服公先見云公久于台悉浙  
中事宜繼起叅藩與左轄日益練達展采錯事惟志  
所欲爲若賦發科謫調補吏胥皆吏蠹蟠結前政所  
不敢問者公排根絕蔓振剔不少縱文牒糾紛隨事  
剗裁司無留政御史按浙者皆歛手無所事事迨撫

湖南提封數千里撫臣尊重受計坐理而已公輶車  
徧歷州郡跋涉險阻不爲厭故事行部以藩臬守臣  
自隨公悉謝去供頓次舍才足周用民不知勞念荆  
湖沃衍而流庸瘠弛科輸煩擾故所至勸農業平徭  
稅民用安集而歲亦比登在鎮逾年多所建白首言  
地瘠民貧兵食不足藩祿無節後繼爲難又以湖湘  
控扼邊徼地大事繁御史按部歲一代勢不得徧欲  
添差御史分蒞湖南北以廣詢謀又言外臣多茂異  
比限以藩府戚屬不得內徙非舊制乞越例推選以

收滯木時雖不盡行聞者以爲篤論顯陵之作經費不貲公長于料簡程省弗懈視他所營率損費十五而功實倍之且規制宏偉民不告病晚興邦禁不肯骫骳徇人苟懼於辜必以法繩之而怨謔興矣蓋公負天下重望高視闊步遇權貴或傲然不爲意而與山林文學行誦士方講均敵禮學攀獎進之唯恐不給坐是忌者側目雖晚躋大位卒困于讒以沒惜哉平居事親孝父病疽公已五十餘與同臥起吮濯扶掖肉血淋漓十指皆潰曾不肯委勞於人處羣從

兄弟尤極友愛。少學于李璠先生。李死，妻萬不免饑寒。公分俸資給，又爲其子置產，旋置旋廢，而其子卒困以死。乃迎萬養于家，死爲欽葬，而給其孫如子。終其身不衰。友人胡欽死，妻方食貧養姑。公俾里中上其事，請表于朝。文牒往來，與一切費，咸自公出。至于里黨族屬婚喪緩急，多倚成于公。其於倫誼甚篤也。爲文不事險刻，雄深爾雅。詩尤雋永，時出奇峭。樂府歌辭，不失漢魏風格。自少已有名世志，舉進士，卽自免歸。與陳侍講魯南、王太僕欽佩，及從弟憲副英、玉。

相麗澤聲望奕然出入所雅遊若李獻吉何仲默朱升之徐昌毅皆海內名流而公頽頽其間不知其孰高孰下也所歷沅湘天台衡岳皆山水勝處雖簿書鞅掌而不忘觚翰所至領客讌遊感時懷古臨觀賦詩風流文雅照映林壑有古高賢特達之風噫不可及已所著曰國寶新編曰近言曰顧氏七記詩文曰浮湘稿曰山中集曰息園集曰憑几集曰登衡小記總若干卷英玉名璵有奇節著寒松齋集並行于時

少保王襄敏公

辛

鼎陽

永陵

公名以旂，字士招。江寧人。生而廣額豐頤，音吐如鐘。弱冠游膠庠，才名蔚起。鄉先生金公澤，以右都御史掌南院解圍，帶贈公正德辛未舉進士，授江西上高知縣。時華林賊方熾，流賊復入江，掠舟揚旗剽劫庫獄。公集鄉兵要害處遍置鐵蒺藜以防之。賊自是不敢窺上高。已又生擒流賊伍廣等數十人，閩境帖然。公益省刑紓賦與民休息，縣大治。選河南道御史臺長。彭公澤尤器重公，一日指其坐曰：「當拂拭待子矣。」

出河南省試期至會宸濠叛閹劉璟者濠黨也乃倡議罷試公徐言江西去汴遠且濠旋撲滅罷試無名遂事事如故璟又傳武廟親征道出汴輒下牒取帑銀四萬備供應諸司莫能應公執不可謂天子御六飛必戒前路勅至圖之未晚今豫發公帑萬一從他道銀散不可歸誰執其咎璟乃沮嘉靖壬午按福建時泉州盜起流劫安溪勢日張公檄分守及都指揮率兵勦之月餘平癸未予告還先是公父感風痺再疏終養家居十年壬辰仍補河南道督北畿

學甫十閱月擢南太僕寺少卿甲午陞大理寺右少卿戊戌春陞光祿寺卿八月陞都察院右副都御史撫治鄭陽時有議革撫治者公繪四省交會圖鏡之石著諭言不可革狀議遂罷庚子陞左副都御史佐院事辛丑陞兵部右侍郎是歲徐呂洪渴漕舟滯不行臺諫言宜如先朝故事簡大臣督治于是公受命兼左僉都御史以行至則先求故道視泉脈循經流塞分殺自徐洪南抵沽頭增闢若干又相地形引水暫築土壩若干漕舸得如期達京師汶上寧陽間

故有四水櫃置湖中曰安山曰南旺曰馬塲曰昭陽勢豪侵沒多獻德邸藉其牽制有司因循不敢問公謂水櫃復庶畜洩有地河溢則懸河以入湖河澁則懸湖以入河足備緩急遂任怨力復之事竣上嘉悅加俸一級癸卯陞右都御史掌南院鄉人憶金公贈帶事至是驗矣公處父母邦務持重屏騶從簡出入舊宅在聚寶門外市人填溢歲時歸祀必由他道謂其子曰昔張湛入里門必步可取以爲法也乙巳考察京官中外翕然服其當是年刷卷御史以公錯

參武弁至千餘員、有旨贖罪、公念衛官多貪、值熟  
減詔至、卽承德意悉蠲之、歡聲載道。丙午、召入  
爲工部尚書、至則琉璃河圓明閣工興、經營節縮、得  
不重費、工完、賜銀幣者再、九月、二品滿考、上遣  
中官賜寶錠羊酒。丁未二月、改左都御史掌院事、公  
思彭公語益感奮、三月、廷試充讀卷官、九月、轉兵  
部尚書、兼提督團營、先是陝西總督曾公銑倡議復  
套業奉旨、命集議俄旨出逮銑、卽命公以尚書兼  
右僉都御史代之、公甚辭、馳入關、亟罷郡縣軍需

停造器皿、邀功生事之言、一切屏遠、又嚴盜馬之罰、  
禁劫營之弊、勵諸將慎固封守、雖倉卒建牙而能推  
布腹心、畢屈羣策、如延安設游擊一人、清平高家二  
堡、與清水營文縣設守備四人、岷州設判官一人、文  
縣參將改分守靈州、參將移橫城、平虜西寧二守備  
改參將疏入皆得允、前此哈密熟番久留甘肅、公患  
之、同都御史楊博廉闢外鉢和寺傍可田可廬、召諭  
諸番爲繕室廬分比舍卽口授田示之、生計仍約朔  
望、族首得入關爲市、諸番感喻稽首聽命、遂徙帳房、

七百有六、男婦三千五百有奇、是舉不煩一夫而數十年種類爲之一清、自二十七年入鎮至三十二年防秋者五、市馬者二、北虜西番無大舉、無深入、戊申虜犯山丹、己酉犯波羅堡及莊浪、已又犯高家堡、再及鎮羌、皆督師敗之、冬出塞揚兵、破虜忻都、庚戌虜擾磨石、移軍敗走之、又敗之寧塞、敗之甘涼鎮、永、斬首一百三級、蓋數年所未有者、復敗之寧夏、西沙窩、辛亥再戰肅州、斬首五十七級、又敗之寧夏、壬子大破虜於清平堡、斬首九十四級、又連敗之扇馬城、燕

麥川、火燒溝、神塘嶺、巴酉。番賊出沒境上，斬一十五級。庚戌，番賊再犯，調兵甘涼，斬五十七級。辛亥，斬三十七級，計斬虜六百六十八級。番族二百級，奪獲夷器共萬六千有奇。駝馬牛羊八千四百，降虜及番族三千餘人。邊人自虜中聞而歸者千二百有六十人。修完延慶定邊等處城堡、窪寨四千六百四十墩臺、一二十二築完瓦查梁及蘭州邊牆二百餘里。前後上功蒙恩廕子者二、賜金帛者八、賜勅獎勵者二、壬子八月二品九年滿考，詔加太子太保，進階光祿大夫。

夫給三代 詰命癸丑春病劇撫按代奏業得  
旨致仕竟不及聞閏三月三日卒於固原督府聞者  
莫不奔哭失聲諸鎮軍民爲罷市者數日蓋公平生  
不務矯激之行而唯存實心不取倖得之功而必圖  
成事不期顯效耀目前而要之久遠不出已意違衆  
論而協諸公議有古大臣之風四十三年間所至政  
聲大振功績可數訃聞 上震悼輟視朝一日予祭  
九壇贈少保 賜謚襄敏仍廢子一人入監蓋異數  
也公性恬和事父至孝病十年食飲起居不暫離側

溷器亦自浣滌與鄉人處皆得其歡心雖介節凜然而無幾微見於顏色於宗族知舊恩義尤篤爲司空入京至東光聞鄉友蔣淮三喪厝連窩寺時舟已踰百里亟命回舟留五日出俸易棺遣人護歸南都鄉人謂公長厚自金公澤後方再見云所著有漕河奏議漕河撮稿督府稿督府奏議若干卷行於世

太子太保周襄敏公

事

金陵

永陵

公名金，字子庚，武進人。正德戊辰進士，擢給事中。陞太僕少卿、僉都御史，轉副都御史，致仕家居六年。以原官薦起，陞兵部侍郎，轉都御史，歷撫延綏宣府保定淮鳳諸處。已陞尚書南京。南京公所生也。因得焚黃先人之墓，人以爲榮。公爲人濶達警敏，自在科中，則已諳習世務，章數十餘上，度可施行而後言。武廟數游幸，公上疏請早朝，躬覽章奏，總權綱，頗見采納。又言京糧歲入三百五萬，而食者歲乃四百三萬。

當痛爲澄汰、中官以迎佛監織、濫討引鹽、暴橫道路、  
當罷、又都督馬昂納女弟後宮外、議云已娠請誅、昂  
而還其女、昂雖不罪、而女竟黜、及公沒、禮部爲公請  
贈謚、亦獨以公爲給事時能陰銷禍孽、指此疏也是  
時奄幸擅勢、與言路爲仇、不旦暮死則竄、公給事中  
九年、老成周慎、卒免於戮辱、而以久次擢爲太僕、公  
貌瓊偉、善議論、初在瑣闈、每九卿廷議軍機大事、衆  
輒目屬公、公口對甚讌、聞者心愜、壬申、狼山之捷、兵  
部議有功將士例陞三級、公笑曰不然、將士有實職

有虛銜，有正副參遊。實職大而虛銜小，有管哨管隊。  
實職小而虛銜大，今一例陞級，則管哨以下皆可爲  
督府，而參副以上或止於都司，首尾倒置，非便。衆是  
之，癸酉議用兵土魯復哈密，公極言西邊虛憊，而土  
魯險遠，且青海之賊窺伺西寧，乃欲遠拯哈密，可乎。  
衆曰：如土魯索金幣何？公曰：彼能效順國家，何愛於  
賞？不然，勦之未晚也。已而卒從公議，于是衆以公可  
屬邊事，以此延綏宜府，皆推公往。公旣豁達不拘謾，  
有帥臣體裁，又善煦嫗接下，其在兩鎮，人見公色詞。

既已心安公公益務寬簡以慰帖之嘗欲笞一二走卒時窮冬多不袴公惻然曰邊人窘乃若是遂不忍笞而多方爲之招商聚粟廣屯積芻以待給其食使人有重生之心又爲之葺駁牆疏石渠期於利盡而人不勞邊人益愛公嘉靖甲申大同殺都御史報至公愕然踟蹰久之曰吾得之矣乃開門召諸將卒盡入環列庭下謂之曰若輩知大同殺都御史乎衆曰知之公曰若輩以殺之爲得已耶衆叩頭曰狂賊自取族耳尚何道公曰不然邊人勞苦甚矣而又虐使


之是趣之殺也假令上下相愛若父子彼將倚以爲命縱授之刃使殺焉其誰忍乎衆大歡呼叩頭退當是時以片言立解上下疑阻及之宣府總督馮侍郎以苛刻失衆公數爭之不得侍郎又以引鹽數萬與其私人爲市而商人無能得者衆固甚怨會諸軍詣侍郎請糧不從且欲鞭之衆遂憤轟然面罵因圍帥府公時以病告諸屬奔竄泣告公公曰吾在也母恐卽便服出坐院門召諸把總官陽罵曰是若輩剝削之過不然諸軍豈不自愛而至此欲痛鞭之軍士聞

公不委罪，若也氣已平，乃擁跪而前，爲諸把總請曰：「非若輩罪也，是總制者罔利不恤我衆耳。」公從容懇諭以利害，衆囂曰：「公生我始解散去，而總制自是亦心愧公。」延宣皆虜衝，公內撫諸軍，外策強敵，關城晏閉，邊甿緩帶，四五訖無敗事，人益以爲才。自公去宣府八年，大同復殺總兵，據城亂，公時起巡撫保定矣。遂往扼紫荆，擒大同謀者數人送京師，會真定巡按李者有疑疾入其邑，聞銃聲驚以邑令謀已欲挾之，廣平守爭之，又以守亦謀已，至遣吏發卒捕守。

一城盡空，公聞變，星馳撫定之上。章露巡按罪狀而臺長庇其屬，爲之訟寃。公復上章力辯。廷論竟直。公而黜御史，公本通達，不務爲崖異，然大體所在，不肯苟爲媿。此蓋公所難者，其以都御史出鎮淮也。章聖梓宮南祔，始奉一旨由江，而諸護行大臣至儀真，議從陸。諸官心知不可，而憚於江險，悒悒不敢任。公獨言：沿江山險路不可通，狀且奉玉體馳峻坂。上下撼頓。上聞之悲惻，柰何。議論往返數日，而諸大臣亦密探沿江路果險，如公言。乃決從江之議。以

鍊維舟行、如期至承天、以葬江干千里、免於伐樹壞屋、役夫數萬人、得無走死山谷中、公之力也。爲刑部尚書、轉戶部、益能其官、乙巳致仕、歸武進、年餘病卒、年七十有四。公喜讀書、雖稗官小史、亦用以資其經略、尤喜爲詩歌、羽檄倥偬中、率不廢詩、有上谷漁陽稿、字書有晉人風骨、家居好獎進後輩、與人言娓娓不厭、與士人言、言讀書、與俗人言、言勤業、莫不取其有益、平生儉樸、旣貴、自奉如居約時、獨祀先歎客極豐潔曰、賓祭、重事也、年五十、遂獨居、未嘗畜媵妾、教

諸子愛而有法，一飲食必有訓。公沒賜葬，祭贈太子。  
太保謚襄敏。



太子太保熊公

事

康陵

永陵

公名浹，字悅之，別號北原。幼質穎敏，博學尤精於易。爲文詞清勁，以儒士舉正德丁卯鄉試甲戌第進士。拜禮科給事中，持議塞謗，一時權姦沮憚已。邪黨濬以南昌叛，初，濬之異圖也，錮公及御史熊公蘭至親爲質，又陰結朝貴，阻絕封事，巡撫孫忠烈公疏七上不達。公曰：「伐謀貴豫，否則羽翼已就，難圖矣。」一日，公偕熊公密授草御史蕭公淮上之，濬大懼，洩露，遂發兵反，不再月果擒，有愴人者，因導武廟南狩。公倡

朝臣累日伏諫不已。奉命查核松潘邊餉，總兵某者怙勢侵冒，動以萬計。公廉實狀聞，寘之法壬午，詔討求追崇典禮。朝論準治平間安懿故事，公在蜀聞之，抗疏論。今上承統御天弗緣所後，而禮濮國不得考於宋英，今獻皇豈濮國比哉？反覆以倫理天性辯之，遂與輔臣抵牾，出補河南右叅議。至則起察招道弭訟，時部境寇作，公曰：「安得以職守分彼此耶？」卽勒兵捕之，會外艱歸。丁亥，召修明倫大典，公乞終制。次年，大獄明，擢都察院右僉都御史，清署魚李。

公講求振刷、臺憲一新、明年陞右副都御史、大典成轉左副、又明年轉右都御史掌院事、七閱月、有人命獄成於廠衛羅織者、勅下法司會鞫、衆依違、公獨奮筆曰、殺人以媚人、弗爲也、力白其枉、旣重忤中貴、而忌公者因擠之、遂罷免。己亥、駕謁山陵、御行殿召近直追論舊臣、上曰、浹老成諭吏部起用、尋陞南京禮部尚書、句曲人王某者、疏欲表揚朱家巷以崇國姓、公曰、天親不可以人爲、今日久疎湮涉牽合、非禮也、遂寢其議、廷論避之、庚子改南京兵

部尚書參贊機務、考核軍政、去留當材品人服其公  
又奏減龍江淺舡餘丁幫甲若干以甦困卒又禁和  
買罷諸苛法留都軍民倚重焉癸卯召爲兵部尚  
書兼右都御史掌院事公慎差遣無遠近勞逸一揆  
於才力曰紀綱之地將以糾正官邪而先自枉可乎  
衆志遂定有巡關者聞警報托疾自逸公遣首領促  
之竟無敢逾宿按歷有擅威福甚者必貶書令省改  
嘗辯官民冤牘剖成案未嘗徇勢屬甲辰改吏部尚  
書公曰太宰天下所與取平者吾安敢臆矣耶凡陞

敘無小大流品日與少宰安福王公、華亭徐公及同屬之賢者共焉。每每注選必語所司曰：此缺相宜否？如否，雖十易之何害？尤獎拔寒畯，惟恐其墮落。臺官自嘉靖初，部使者舉刺漸廣。公曰：非制也。其敝有二：一、炫威市恩，不免矣；請凡中差諭列，苟非其專職，無濫及。遂著爲令。公在部院，京察二外察一，皆蒞以公嚴。京察惟黜其行誼尤無良者，有直道被誣者，公必辯救之。凡遇姦人傾陷善類，公皆冒言正色諍而全之。衆皆悚服。公宰銓逾月，上優以弼臣之遇，凡朔望

拜朝東遣祭先師帝王社稷皆預焉乙巳公滿考六年加太子太保母萬太夫人年九十公乞終養上溫旨勉留詔有可以粟帛存問曠典也公自是殫竭忠盡於國體公議無弗侃侃者八月疏斥乩仙之妄忤旨公惶恐待罪至十二月固乞休遂遣官校械繫以歸執氓役在田凡十年足跡不入城府每見郎報知時事災異輒憂形於色尤以未報國恩爲恨每厭術數之學好觀程朱語錄體驗於身心以是臨大政決大疑確有原本蓋以抗直任事以惠利

救時公識其大矣、

尚書胡公

事

永陵

昭陵

今上

公名松，字汝茂。幼卽嗜學，家窘無所得異籍，則傍借抄讀，更輯古名臣奏疏諦觀之，喟然嘆曰：「經理天下者不當如是耶？」其志向已槩見於此云。嘉靖戊子領鄉薦，己丑成進士，授東平知州，秩滿遷南京兵部員外郎，改禮部祠祭司，進郎中，陞湖廣叅議，山西督學副使，進叅政，以言事指斥權貴，得罪家居者十餘年。後用言者薦，再起公爲陝西叅政，尋轉浙江按察使，進右布政使，轉江西左，遂擢公爲右副都御史，巡撫

江西陞兵部左侍郎改吏部陞南京兵部尚書尋以  
吏部尚書召入方其爲州時州有巨豪劇寇前守累  
不能收捕設法擒殲之民有訟必先諭之以理不得  
已方置於法故民莫不愛公之惠而畏公之威至構  
祠祀公其在留都時以部員冗職稍有餘暇卽聚經  
史求微詞奧旨參稽考互必浹洽曉暢而後已且曰  
爲學如儲積旣多水旱盜賊應用將不竭矣及在湖  
藩職糧餉值湖北叛苗鎮筭之變公紓籌策親履行  
陣遂致蕩平捷聞特降璽書慰勞且有白金絲幣

之賜。秋闈試士，以公爲提調，而是科得士爲多。其督學山西時，公乃樹風聲，明經術，將以儲實材爲天下用，而士類亦彬彬然嚮風矣。會虜酋入南地，抄掠民倉卒奔避太原。太原城堅閉，弗納。公憤然曰：「是非我赤子耶？若何弗納？」弗納。其奚用守爲？守將懼，遽納民。民賴以全活甚衆。於是公遂上疏曰：「虜之敢干深入者，以邊將暗悞失於先機故也。賞罰不得當，功罪不時審。奸豪潛入虜地爲嚮道，而莫之察。帥臣隱挫，如中。」  
以捷聞。而弗之究，則備禦何由嚴？而虜安得不深。

入竊爲國家憂之，謹上便宜十二事。曰懲苟玩，曰堅  
障堠，曰懷携貳，曰蓄孳牧，曰慎任使，曰利器具，曰廣  
間諜，曰清耗蠹，曰嚴備禦，曰核屯戍，曰預積貯，曰撫  
傷痍，亹亹數千言，皆切中邊計要害。上可其奏，即  
擢公叅政，協守鴈關，蓋知公可大用也。公文臣也，一  
旦起言邊事，人固忌之，而疏中語頗侵當時用事者，  
以故得罪去。公家居，築娛老堂，奉二親，別構尚友堂，  
聚天下諸書讀之，又曰：是文耳，曷若偕一二同志遊  
東南，歷覽形勝，當有脫悟處也。時公同年友羅君洪，

先唐君順之亦以言事廢，二公並有志學古者與人  
宜興山中盤桓寃解而公之神已脫然超上乘矣。當  
是時言者以邊才薦公乃起公陝西駐平涼乃條數  
十百事若嚴保甲均賦稅選伉健置常平大都可爲  
經久計者其在浙將吏多骯軍食傳峙公案發之賊  
巨萬人心肅然其撫江西適流賊豕突殺長吏公受  
命卽率浙兵千餘人倍道出賊不意悉殲之因議曰  
豫章爲閩廣下流當受其衝莫若於要地增置城濠  
屯戍守先事而待之復減租稅理冤獄舉賢良黜貪

墨民得蘓息乃立石頌德焉始廣西賊帥張璉者黠慧獁獰爲諸酋最其巢穴連諸洞寨驅羣蠻時出寇抄邊郡苦之諸路討之數歲不能克至是悉平蓋公之功居多云公勲隆望重不數遷卽爲太宰公固將獎恬退抑躁進擢用才雋以報稱德意而一旦遘疾不起矣公於書靡所不讀然得其精意大義皆可見之施行故事起輒應不假旁求探索如武庫之儲百器畢具唯其所用至其所爲文出入班馬其大旨本之程朱其體格則嚴而峻斯本深末茂者乎有奏疏

書記傳志詩文若干卷行于世

尚書鄭端簡公 事 永陵

公名曉，字室甫，別號淡泉。其先開封人，遠祖從宋高宗南渡，始家鹽官，遵化訓導。吾核公季子，其母費夫人也。公少有異質，年甫十歲，吾核公授之經傳，卽能通經傳，復授以子史，卽能讀子史。吾核公數指古今人賢不肖，事誠之曰：汝他日當爲此，不得爲彼。故公自少至老，毅然必欲爲君子，不以毀譽利害，戢其心。嘉靖壬午，舉浙江鄉試第一。明年中會試高等，學士中峰董先生力薦之政府，政府亦知公名，公竟不一

謁政府尋授兵部職方主事日取故牘閱之由是盡  
知天下阨塞與其士馬虛實強弱之數大司馬蓉溪  
金公屬摸次九邊圖誌三十卷人爭借其草錄之甲  
申以議大禮杖闕下乙酉大同卒殺其巡撫都御  
史當事者請宥之公抗疏以爲不可不報丁丑憂服  
除補武選卒丁父憂去家居者又八年會世宗皇  
帝特詔起廢時許文簡爲太宰調公考功逾年始至  
至則分考辛丑會試轉郎中巡按御史有所論劾不  
當者公勘得其實反謫御史夏貴漢罷相有

詔考察臺諫分宜意在去異已者公更黜其所厚者若干人癸卯分宜子世蕃以治中求爲尚寶丞公謂非故事不聽分宜益怒密疏公抗 上市恩 詔貶和州判官而世蕃遂遷尚寶司丞矣公至和日夜治民事訪諸所欲惡次第罷行之民大悅未幾遷太僕丞丙午遷南考功郎中尋遷南尚寶卿歷南太僕少卿鴻臚光祿太常卿癸丑遷刑部右侍郎甲寅改兵部兼僉都御史出撫鳳陽會倭奴入寇江之南北運道爲梗上下憂之公至鎮勵將士選民兵集鹽場之

壯勇禦之於通泰、襲之於如臯、擊之於海門、搗之於呂泗、圍之於狼山、斬首九百餘級、賊震恐遁去、東南之賦四百萬石、歸輸於京師、無後期者、又築三里閘以通漕渠、開湖櫃以興水利、淮以南迄今無水患、分宜故銜公僅擬資予加俸、公素以文學聞海內、又癯然若不勝衣、而出撫以武功顯人益知其不可測、乙卯遷吏部左侍郎、尋遷南京吏部尚書、未發、世宗以公知兵、特旨畱爲右都御史、協理戎政、奏罷諸軍之後於工作者衆咸感奮、戊午改刑部尚書、會大

司馬虞坡楊公總督宣大公奉 命兼掌兵部事時  
議謂宣大重鎮欲畱楊公久鎮北門公上疏謂楊公  
還本兵則九邊將帥咸得人而戰守之事咸傍所可  
恃以無恐寧獨宣大爾邪 世宗皇帝雅重楊公且  
重公議乃 詔楊還本兵公還刑部奏諭錦衣所治  
獄多失實而五城御史受民訟非 制既又謂王直  
于法必當誅留都亂卒于漸不可長勑分宜張翀董  
傳策吳時來不可罪諫立儲郭希賢不可殺薊鎮閩  
廣提督憲臣王忬阮鵠悞事之失不必深求咸與分

宜議不合時御史鄭存仁者善揣時宰意妄以職掌奏公公具疏述故事甚悉分宜不能奪乃從中構之遂忤旨詔曰鄭曉執法終是自尊乃落職還公

家居角巾布衣數攜一童子訪故所識與論桑麻晴雨或時共飯山蔬水藻相對終日見者不知其爲名卿性儉朴尤審於醉後所居絕去紛華松窓竹几蒲茵練帷蕭然如山僧焉丙寅秋病卒子履淳等訟公受誣事于朝詔復公官穆宗改元賜祭葬贈太子少保謚端簡廕一子入監讀書淳舉嘉靖壬戌進

士歷尚寶丞，準以廩官，南京都察院照磨。公爲學，雖主用世而於性命之說，義利之辨，咸能剖析精微，直窺堂奧。華亭徐公謂其持論正而不迂，嚴而不刻，剛而不激，高而不亢。與唐馬周、陸宣公抗衡，真知言也。所著有《吾學編》、《古言》、《今言》、《奏議》、《文集》、《諸經解》，行於世。

太子少保李敏肅公

事

永陵  
卷上

昭陵

公名世達字子成號漸菴晚更號廓菴關中涇陽人生而穎異日誦千言自其髫年卽具博大之器卓犖之識一時薦紳先生咸器之年十二督學使者殷公置高等補博士弟子員尋爲方伯楊恪愍公所知諸所崇禮備至西安守石州胡公甫下車見而奇之與爲忘年之交當是時已瑩精大道孔孟根宗伊周事業日在寤寐中嘗夢謁高皇帝帝授明珠一命曰善自珍之異日當爲國寶也年十九登嘉靖壬子賢

書丙辰成進士授戶部主事癸亥調吏部考功司主  
事已調文選以養病歸隆慶改元起陞稽勳員外郎  
未幾調考功戊辰陞本司郎中調文選丁會大父憂  
三年起陞膳黃通政給假回起陞南太僕卿今上  
改元陞右僉都御史巡撫山東陞右副都御史總理  
河道戊寅以原官巡撫浙江旋告病復以原官起總  
督漕運兼巡撫鳳陽甲申陞南兵部右侍郎改戶部  
是歲陞吏部左侍郎丙戌陞南吏部尚書改南兵部  
尚書叅贊機務召爲刑部尚書改都察院左都御史

掌院事壬辰以六年滿加太子少保癸巳乞骸骨歸奉旨馳驛養病己亥卒年六十有七計聞上震悼久之賜諭祭謚敏肅始公在戶部監兌湖湘旦暮竭心計佐度支之急前後入銓司佐黜陟品藻人羣百不失一會大計當事者拱手聽裁卽見斥者無不心服以去時徐文貞公在柄地而秉銓者爲嚴文靖公公與陸莊簡公同爲司屬得以摻揚側陋薦進之往往從田間躋華廡列卿貳銓局之公流聞宇內前後所未有也其開府山東議班操蠲積逋減馬價

著爲絜令時蔣大爵范儒以明經舉安廷璞李遵齡  
以知印擢楊果趙蛟以都吏進而自東阿朱萊陽一  
桂吏議又力昭雪之不以身格爲軒輊也膠河議起  
公身履其地相土宜權經費所爲條析利害甚具東  
土不至勞民傷財爲大役累公之功多矣戊寅改撫  
浙江不數月公疏辭疾引退者八年起督漕河念寶  
應湖陰惡歲漂艸艤無筭爲請開越河殺水勢列  
五款以上綱領節目犧然畢具暮年而竣比原估料  
價省費一萬有奇晉南太宰與剛峰意氣相期

擔荷國事所甄叙羣品如觸眉睫大察汰遺數百人  
下逮輿臺無不悅服者入爲大司寇章數十上無非  
平允詳慎務廣 上好生之德時 上惡邊臣僞增  
首功怒至不可解公劑于輕重之間以定厥罪而比  
附重辟執不奉 詔卒出其人于必死之地真回天  
力也會審遣廩校偵部事公慮弊竇不可長屢疏明  
非體乞亟罷去 上改容謝乃已權璫憑藉威靈勢  
張甚在事諸臣莫敢誰何公具疏先革其禁近供事  
徐正罪以杜禍源是又發宮闈所未發之奸而開廷

臣所不敢開之口已御史職雄俊所抨擊無與抗者  
往臺長不甚有所甄別公謂吏治日衰民生寡遂皆  
職此之繇乃舉回道考察例行之斥韓介劉瑜黃正  
色輩五六人臺中始悚然改觀易慮竚以奉公爲急  
且申明憲典傳布天下俾撫巡無得以問餽相加遺  
所薦下吏亦無得執贊及門違者論如法于時道路  
風清邑直弊絕嗚呼盛矣公正以禔躬忠以徇國不  
難以一人排羣議觸忌諱侃侃然貞而不激遁而不  
隨宏而不疎細而不佻獨斷于是非雜遷之中抗色

于傾側危疑之際，國事既濟，身名亦全，誠可謂臣主相遭，千載一時也。詳見奏議八卷。

焦弱侯論曰：孔孟論學莫急於知人。蘇子瞻乃謂蕭何知韓信非有術而可學，何其謬也！李公胸懷洞達，無所不茹納，卽窮鄉下吏，片長寸善，或舉以告公，無不知者，此豈得之性哉？呂聖功爲相，於四方替罷謁見者，必問地方人才，客去隨疏於籍，故朝廷索才，如取之橐然譬之良工構室，棟梁榱桷，小大畢獲，誠儲之素也。余見公數巨冊，人才臧否良苦，種種皆具，惜

夫未正冢卿之位而公去，然其及於世者亦豈微也哉。公忠體國，得大體。雖其不悅者，亦無所傷云。

尚書陸莊簡公

事

永陵  
今上

昭陵

公名光祖，字與繩，別號五臺。浙之平湖人性岐嶷，不凡。四歲讀毛詩成誦。八歲從其父游道遇客語安南事，公曰：是必克夫。以聖天子聲罪討小夷，如振槁然，何煩兵甲。客奇公言。嘉靖丁酉年十七與父同舉鄉試，又十年丁未成進士。授濬縣令。濬故額五十里，邑疲耗不能役。公請裁其十里，以寬民力。當路不可。公持益力，良久卒如公請。秋潦傷稼，公涕泣呈兩臺，皆以非時却其贖。公自爲疏上之辭甚懇。天子惻。

然下部覆減稅十之三兩臺心不平不能難也邑多輕俠爲盜橐公把其宿負編之伍而討以軍令咸請盡力爲耳目盜發輒得獨鉅盜李以平蓄異志不悛乘公入覲嘯萑苻中爲變公歸授計立擒之邑太學生盧柟富而才先後令皆與相昵後令至柟爲具享令令不時至柟拒戶嫚罵令恚中柟麗大辟坐繫十三年有司以其高貴莫敢釋公抵任立出之柟爲謝公曰我仲三尺爾竟不與見陶仲文以方技得奇寵勢張甚邑有李榮爲其私人橫行里中公捕置諸法

仲文奉命祠邯鄲故出魏郊爲榮地公不爲移獄  
陶亦莫能中公內鄉王占長垣民田爲業民訟諸臺  
長安令嘆惜不能剖臺以屬公勘果民產立歸長垣  
民庚戌虜闖入塞尚書趙錦議役三輔民築塞垣公  
持不可錦劾公撓軍興上置不問公復請出錢踐  
更三輔民賴公皆免發太僕馬少無以資戰士下諸  
邑買補馬價騰貴公故緩之馬益集所省繙錢比他  
邑殆半令濬四年課高第宗人緹綺帥炳緣上寵  
以要樞引公公不應得南祠部郎秩滿之京相嚴嵩

稔公名語人曰陸君曶我符卿可得也公不往會給事吳時來劾嵩公與時來善嵩憾之欲以考功法中公南冢宰王用賓力救得免遂以母病乞歸遭母喪廬居服闋值嵩罷起祠部郎尋轉儀曹侃侃持正論守陵宦官張方進甘露請恩公却之縣令吳府上方藥欲邀寵公召至邸責曰若儒起而技幸哉官以爲榮也進以技何榮之有府悔稱疾去景寧王入京自陳設醮祝釐有司邊維垣等毀牌位不道上怒甚公言王擅離國違祖禁宜有所懲艾他萋菲語不

足聽。上從公議。今上生裕邸。公請告廟。受百官賀。疏入。留中。有頃。賜聖母寶鑑。中外翕然謂公有卓識。若此。癸亥。調司封郎。已轉文選。公雅有人倫鑑。知天下士高下甚悉。至是佐太宰語。對如流。黑白分明。乙丑。佐計。汰黜惟允。不爲權勢假。而又憐才持大體。如蒲坂王公崇古。仁和張公瀚。嘉魚方公逢時。曲周王公一鶚。肥鄉張公學。顏。皆掛人齒頰。公力爭之。謂此皆大度士。可濟緩急。奈何以蜚語挫抑。王公等得無恙。其後皆躋九卿。以邊疆績著。淳安令海公。

瑞爲上官所排，公力明其志節，得授戶部主事。侍郎朱公衡以才地自負，南司空缺，公首推衡。衡方在列，色變曰：「陸君南我耶？」已，公升奉常典屬國。朱嗾孫御史論公恣橫，內瑞王本仁申宿憾，從中構得旨罷免。居數年，今上登極，言者謂公不宜久廢，起佐南問政，歷遷廷尉。以外艱歸，丁丑，起歷兩京廷尉。晉少司空，初，公與大學士張公居正同年，厚善。及張公在政府，公引誼規諷甚悉。已，張公承父諱，奉旨不服憂，公遺書開諭，已謫言官，又遺書止之。張公不納，然

未有以傷及論改折事。公固請輕折。張公變色曰。公爲豪地耶。公曰。我爲菜色民爾。寧知豪夫身忝大臣而民隱默不聞。非夫也。張公語塞。南御史張一鯤承旨論公。公復罷。張公卒。起南少司馬。尋轉少冢宰。時諸後進皆文致江陵。罪以逢當路。公獨謂江陵府權得大過。非弄權也。且擁扈綱繆。其功亦安可泯。衆惡其異。出遷南司空。力請歸。又三年。起南司寇。時南都諸要官爭主獄。公謂獄法司制也。持不動。主事劉以渙不受囑。爲御史劾。公抗章論御史妄言。曰。法官當使天下。

無冤民而奈何。枉其屬哉。事竟白，已改南太宰。先後與大臣列巨璫、張鯨不法狀。蒙旨切責。後鯨卒敗。庚寅召入爲大司寇。光祿署丞徐性善貲甲長安。御史所有需不應。論徐盜內府財。籍其家。擬大辟。公知其冤。三跪得減等。辛卯夏。冢宰闕。廷推公。上雅重公名。遂拜爲冢宰。公旣掌銓。抑僥倖拔寒素。正體貌。一如祖宗朝故事。戒闈者無入中涓書時。旨下署名用二臣入內閣公言。廷推舊制毋壞。祖宗法。上從之所推。轂海內遺賢殆盡。壬辰主計。苞苴。

絕跡所汰黜卽親故不避或列臺省有時譽者亦不  
顧已復請旌廉吏示獎勸未幾疏用前建言主事饒  
伸御史萬國欽失上意有旨斥遷郎王教等公  
爲申救因自引咎不聽會有乘此論公者公稱疾不  
出亡何詔許歸時大學士王公家屏亦以爭冊立  
去兩賢同日出都門觀者噴噴嘆息云公歸謝謁客  
兀坐小室焚香淪茗經旬月不窺庭丁酉仲冬得疾  
至晦日命具浴曰我將逝浴已危坐瞑於正寢是日  
海上星隕大如斗擊地有聲亦異已初公館於陶氏

夜夢二神界火器至前曰祝融將有所儆以公在薄其灾語畢焰起公力懇神靈威曰第及三舍不傍延也翼日果爇三楹嘗渡江遇疾風舟幾覆公肅衣冠自訟須臾若有物曳舟者泊淺洲免焉自此戒水族及諸牲庖無鮮食生平口不道阿堵手不親衡石飯無鑿衣無綺篋無餘錢仕居華要門未入一繚一金居鄉好行其德義廩義田歲有加遇饉必罄家粟爲賑所識以緩急告者無不應梁端肅公材裔孫在南都貧甚公嘆曰昔人稱廉吏安可爲謂此耶佐之請

廢子

朝與人交披肝見膈杜機絕餓甯平孫公丕

揚向爲御史論公公曰孫公賢者寧有他吾誼當歸其言實玉成我矣慇懃謝之其後在事遇薦士未嘗不及孫也卒以大司寇起之御史陳登雲亦嘗論公壬辰大計公推陳掌河南道言論相權若無纖介至於當利害剖邪正遠識高節天下望如麟鳳久而愈重且信通籍以來六仕六已強半丘壑未嘗有所攀附聞天下長者雖素不識面及有夙隙者必亟推轂不啻口出然終不令其知郡邑政或不宜民或有寃

抑公一聞。卽切切以告其人。或變容而公意氣自若。  
私居無戲言。無遽色。子弟彌獲化之。申申如也。訴訴  
如也。平生憐才任事。卓非儕輩所敢望。蓋公之學主  
於信心。故亟進亟退。略無繫吝。公之心一於爲國。故  
任嫌任怨。不爲雷同。可謂凜然古大臣之風節矣。